

草有驢馬多橐它

師古曰它古他字也音徒何反

能作兵與婞羌同初

武帝感張騫之言甘心欲通大宛諸國使者相望於道

一歲中多至十餘輩樓蘭姑師當道苦之

師古曰每供給使者受其

勞費故厭苦也

攻劫漢使王恢等又數為匈奴耳目令其兵遮

漢使漢使多言其國有城邑兵弱易擊於是武帝遣從

票侯趙破奴將屬國騎及郡兵數萬擊姑師

師古曰屬國謂諸外

國屬漢也

王恢數為樓蘭所苦上令恢佐破奴將兵破奴與

輕騎七百人先至虜樓蘭王遂破姑師因暴兵威以動

烏孫大宛之屬

師古曰暴謂顯揚也

還封破奴為浞野侯恢為浩

侯

蘇林曰浩音昊

於是漢列亭障至玉門矣樓蘭既降服貢獻